

Headlines

1. प्रधानमंत्री नरेन्द्र मोदी होर अज्ज मन की बात कार्यक्रम राएं अपने बचार सांझा करगंन।
2. उपराज्यपाल मनोज सिन्हा होरें नमीं दिल्ली च आयोजित पूर्वाचल उत्सव "माटी" दे 8में संस्करण च हिस्सा लैता।
3. जंगलात ते पर्यावरण मंत्री जावेद अहमद राणा होरें जंगलात मैहकमे दे कम्मकाज दा जायजा लैता।
4. 9 रोजा चैत्र नराता उत्सव अज्ज थमां शुरू। जम्मू खित्ते च बी अज्ज सारे देवी द्वारे च श्रद्धालुएं दा भारी रश दिक्खने गी लब्भा'रदा ऐ। उपराज्यपाल होरें नराते दे पवित्र मौके पर सब्बने गी शुभकामनां दित्तियां।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम "मन की बात" च अज्ज इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किशत होग। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई. आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

LG-Purvanchal Fest

उपराज्यपाल मनोज सिन्हा होरें दिल्ली च आयोजित पूर्वाचल उत्सव "माटी" दे 8में संस्करण च हिस्सा लैता। इस मौके पर बोलदे होई उपराज्यपाल होरें माटी ट्रस्ट ते एहदे कन्नै जुड़े दे हर व्यक्ति दी सराहना कीती। उनें आखेआ जे इस जतन राएं पूर्वाचल दे बचार, संस्कृति ते कला गी दर्शाने दा मंच हासल होआ ऐ। उपराज्यपाल होरें आखेआ जे पूर्वाचल नै साढ़ी विविध संस्कृति ते रिवायती मुल्लें गी मजबूती कन्नै संजोया ऐ। उपराज्यपाल होरें पूर्वाचल दे स्वतंत्रता सैनानिएं, लेखक, कलाकारें, उद्योगपति ते मन्ने परमन्ने दे इनें लोकें गी श्रद्धांजलि भेंट कीती जिनें आधुनिक भारत दा निर्माण ते लोकें दे जीवन गी बेहतर बनाने लेई कम्म कीता।

<><><><><><>

Rana-Review Meeting

जंगलात ते पर्यावरण मैहकमे दे मंत्री जावेद अहमद राणा होरें कल जम्मू च इक बैठक दरान जंगलात दे कम्मकाज दा जायजा लैता। उनें मैहकमे दे कम्मकाज गतिविधिएं दा निरीक्षण करने दे कन्नो कन्नी जंगल दे प्रबंधन कन्नै जुड़े दे पैहलुएं जियां उंदी सांभ संभाल, एक पेड़ मां के नाम अभियान, समुदाय दी शमूलियत ते टिकाऊ विकास ते समाजी जिम्मेदारी पर बचार बमर्श कीता। बैठक च महत्वै आली फ्लैगशिप स्कीम दी ठोस ते माली प्रगति दा बी जायजा लैता गेआ। मंत्री होरें जंगलें च लगने आली अगग पर काबू पाने लेई मकामी लोकें दी शमूलियत पर बी जोर पाया।

Rana PHE

जलशक्ति मंत्री जावेद अहमद राणा होरें औंदे सोहे दरान पानी दी सप्लाई बिजन कुसै दिक्कत परेशानी दे बरोबर बनाई रखने लेई पैहले थमां लोड़चदे हीलें ते बंदोबस्त करी रखने पर जोर दित्ता ऐ। कल जम्मू च मैहकमा पीएचई दे चीफ इंजीनियर विकास शर्मा ते सरबंघत होरने अधिकारिएं कन्नै लग्गी दी इक बैठक दरान गर्मिएं च पानी दे त्रोड़े शा बचने दे उपाएं दे बारे च तफसीली सोच बचार कीता गेआ। मंत्री होरें पेश आई सकने आलिएं दिक्कतें दे बारे च चर्चा कीती ते इनेंगी दूर करने लेई लोड़चदे उवाह पैहले करी रखने बारे सुझाएं गी बी उजागर कीता। उनें आखेआ जे लोकें गी पीने लेई साफ सुरक्षत पानी हर सूरतै च उपलब्ध कराया जाना लोड़चदा ते सोए दरान इस बारे कोई दिक्कत शकैत सामने नेई औनी लोड़चदी।

<><><><><><>

JSCI-Fare Revision

जम्मू स्मार्ट सिटी लिमिटेड दा आखना ऐ जे ओ समूलचे जम्मू शैहर ते एहदे आले दोआले दे इलाकें ते जिले लियां कटड़ा, उधमपुर, सांबा ते कठुआ च लोकें गी भरोसेमंद ते वाजिब भाएं पर ट्रांसपोर्ट सुविधा उपलब्ध कराने लेई वचनबद्ध ऐ ते एहदे लेई लोड़चदे सब्बै हीलें करै करदी ऐ। गड़िङ्ग दे रखरखाव ते ट्रांसपोर्ट सुविधा दे मयार गी बनाई रखने लेई स्मार्ट सिटी लिमिटेड नै पैहली अप्रैल 2025 कोला गड़िङ्ग दे कराए च 7 फीसदी दा बाद्धा करने दा फैसला लैता ऐ। कराए च एह बदलाव खजाना मैहकमे दे निर्देश मूजब लैता गेआ ऐ।

<><><><><><>

Rajouri School

राजौरी जिले दे सरकारी हायर सकेंडरी स्कूल डांगरी गी कुड़िएं दे पीएम श्री हायर सकेंडरी स्कूल च तब्दील कीता गेआ ऐ। इस स्कूल गी पीएम श्री स्कूल च तब्दील करने दे कन्नो कन्नी त्रै नमीं लैब्स बी कायम कीतियां गेइयां न, जेहदे च एस्ट्रो लैब ते अटल थिंकरिंग लैब शामिल ऐ। हुन इस स्कूल दे बच्चे गी नमीं लैब्स च नमीं तकनीकें राएं पढ़ाया जाग।

<><><><><><>

Navratri

मुख्य भरै दे मंदरें च बड़लै-सवेले दी आरती दे कन्नै 9वें दिनें तगर चलने आहले चैत्र नरातें दे उत्सव दा अज्जै थमां शुभारंभ होई गेआ ऐ। एह त्यौहार देवी दुर्गा ते उं'दे 9 अवतारें दी पूजा गी समर्पित ऐ। मुख्ये दे बाकी हिस्सें आला लेखा समूलचे जम्मू प्रांतै च बी नराते दी रौनक, श्रद्धा ते उत्साह चबकिख्यां दिक्खने गी लब्धे करदा ऐ। सब्बने मंदरें टकोहदा करियै मां दुर्गा दे मंदरै च बड़लै थमां गै श्रद्धालुएं दी बड़ी मती भीड़ ऐ। रियासी जिले च दुनिया भरै च मशहूर श्री माता वैष्णवे देवी जी दे दरबार दे इलावा जम्मू च बावे आली माता, नगरोटे कौल कंडोली माता, कठुआ सुकराला माता, माता बाला सुदंरी, सांबा च चीची माता मंदर ते होर केई देवी द्वारे च अज्ज श्रद्धालु मत्था टेकने लेई आवा करदे न। 9 नरातें दरान मां दुर्गा दे 9 रूपें दी पूजा अर्चना कीती जंदी ऐ। अज्ज पैहले रोज माता शैलपुत्री दी अराधना कीती जा'रदी ऐ। पर्वतराज हिमालय दी धीह दे रूपै च जन्मी दी मां दे इस रूप गी शैलपुत्री नां दित्ता गेदा ऐ। 9वें दिनें दे इस उत्सव दा समापन भगवान राम हुंदे जन्मदिन यानि राम नौमी दे ध्याड़े पर हुंदा ऐ।

<><><><><><>

Navratri Greetins

उपराज्यपाल मनोज सिन्हा होरें चैत्र नराते दे मौके पर लोकें गी शुभकामनां दित्तियां न। अपने सनेए च उपराज्यपाल होरें चैत्र नराते दी मुबारकबाद दित्ती। उनें कश्मीरी पंडित समुदाय दे लोकें गी नवरे दियां बी शुभकामनां दित्तियां। उपराज्यपाल होरें आखेआ जे एह पवित्र ध्यार बुराई पर अच्छाई ते अज्ञानता पर ज्ञान दी जित्त दा प्रतीक ऐ। उनें मेद जाहर कीती जे नराते दा ध्यार असें सब्बने गी सेई रस्ते पर टुरने लेइ प्रेरित करोग ते ऐसा समाज बनाने लेई प्रेरत करोग जेह्दे च महिलाएं गी राष्ट्र निर्माण च बरोबर दियां हिस्सेदार होने दा सम्मान थोए। उनें मां दुर्गा प्रार्थना कीती जे ओह सब्बने पर अपनी कृपा बनाई रखन।

<><><><><>श

Doda Mkt Cheek

ईद-उल-फितर ते नराते दे ध्यार गी दिक्खदे होई डोडा दे डिप्टी कमीशनर हरविंदर सिंह होरें इनें ध्यारें दे इंतजामें दा निरीक्षण कीता। इस मौके पर उंदे कन्नै खुराक ते होर दुए मुत्तलका मैहकमे दे अफसर बी मजूद हे। उनें केई सार दकानें दे जायजा लैने दे कन्नो कन्नी कस्बे च यातायात प्रबंधनद। बी निरीक्षण कीता। इस मौके डिप्टी कमीशनर होरें पार्किंग आले थाहरें दे अलावा कुसै बी होर दूई थाहरें पर गडिडयां खडेरने आले ते दकानदारें आस्सेआ सार्वजनिक थाहर पर समेयान लाए जाने खलाफ सख्त कारवाई कीती जाग। जिला प्रशासन लोकें दी सहूलत लेई वचनबद्ध ऐ।

<><><><><>श

Doda Surgical Camp

रोटरी इंटरनेशनल इंडिया ते सेहत मैहकमा डोडा दे सैहयोग कन्नै 16 थमां 23 अप्रैल 2025 तगर मुफ्त सर्जिकल कैप आयोजित कीता जा'रदा ऐ। एह शिविर सहायक अस्पताल सरकारी मैडिकल कालेज जीएमसी डोडा ते एसडीएच भद्रवाह जम्मू कश्मीर दे बाहराथमां मन्ने परमन्ने दे सर्जन डाक्टर नमीं तकनीक राएं आप्रेशन करगंन। इस जतन दा मकसद उच्च मयार आली मैडिकल दिक्खभाल ते दलाज सुविधा उपलब्ध करोआना ऐ, खास करी उनेंगी जेह्दे मैहगर इलाज मुआलजे आली सहूलत हासल नेई करी सकदे। डोडा दे मुख्य मैडिकल अफसर डॉ. ओम कुमार होरें जिले दे लोकें गी अपील कीती जे ओह समें सिर पंजीकरण करोआन ते इस सुनैहरे मौके दा लाह ठोआन।

<><><><><><>